

*Nos studio communis utilitatis, & peculiari illd incensi benevolentia, quæ Cæsarem, vos ipsos, & ordines, populosque istos complectimur, illas prophetæ Nahum voces effundimus: Ecce super montes pedes evangelizantium, & annuntiantium pacem. Cessent dissidia; subiecti, & fideles populi prosequantur obsequio principem suum; princeps vicissim subditos amore, uti filios foveat, & ad se redeuntes obviis ulnis excipiat; integra & intacta maneant Ecclesiæ jura; intemerata sint jura principatus; illæsa servantur jura populorum; instaurentur bonarum artium celeberrima studia apud Lovaniensem Universitatem juxta canones, & reddatur provinciis obedientia, amor, lætitia, divitiæ, pax denique, & tranquillitas. Hæc in Domino cupimus, hæc urgemus, hæc a vestra opera, prudentia, & pietate nobis pollicemur, ut filii scilicet pronis auribus tam anxias, tam graves sui parentis voces excipiant. Hæc denique a Deo O. M., a quo omne bonum est, descendens a patre luminum, effusis precibus, lacrymisque diu noctuque petimus, & obsecramus, quod tam princeps, quam populus sedeant aliquandò, ut verbis Isaiæ utamur, in pulchritudine pacis, in tabernaculis fiduciæ, & in requie opulenta; quandoquidem si pacem habetis, Deus pacis & dilectionis erit vobiscum. Interim celestium bonorum auspicem, nostræque in vos singularis voluntatis pignus apostolicam benedictionem tam vobis, quam gregibus vestræ curæ commissis peramanter impertimur. Datum Romæ apud S. Petrum sub annulo piscatoris die 13 Januarii 1790, Pontificatus nostri anno decimo-quinto.*